

1909 – Préf. Li Nouvè dóu Fougau – Jh Chevalier

Maiano, 12 de Febrié 1908.

Gènt ami Chevalier

Ai lagi, tout-d'un-tèms, *Li Nouvè dóu Fougau* que me vènes de manda, e lou proumié coumplimen que vole te faire es d'avé agu lou bon goust de canta en prouvençau la Neissènço de Noste-Segne.

Lou Nouvè es avans tout lou pouèmo di pastre, e tant que dins Prouvènço li pastre e li pastresso parlaran prouvençau (e mau-grat lis escolo n'i'a encaro pèr de siècle), sara contro naturo e contro lou bon sèn de faire canta'n francés, dins nòsti glèiso de Prouvènço la pastouralo de Betelèn.

Vaqui ço qu'an pas comprés li capelan moundan que, despièi trop de tèms, foro-ban disson di Calèndo lou pan signa de nòsti rèire, lou bon pan calendau, pasta de fe crestiano e de prouvençalo joio. Aquelo counsideracioun sus l'auto counvenènço, religiouso e nacicunalo, de counserva piousamen à nòsti fèsto de Calèndo soun gàubi populàri e gaiamen tradiciounau, l'as poulidamen expandido e l'as claramen demoustrado dins l'estùdi que legiguères au Coungrès di Soucieta Sabènto de Prouvènço e qu'as bèn fa d'apoundre à ta garbeto de Nouvè.

Adounc, moun bon, siagues lausa d'avé, en plen Marsiho, canta fidelamen en puro lengo nostro, la neissènço dóu Diéu que vouguè naisse dins la pastriho.

A tu e à toun Fougau, couralamen.

F. MISTRAL.

© CIEL d'Oc – Juliet 2009